

A painting of Jesus Christ, shown from the waist up, wearing a yellow tunic over a brown robe. He has a beard and dark hair. He is leaning forward, holding a wooden staff in his right hand, and reaching out with his left hand towards a small white lamb. The background consists of green hills under a blue sky.

Gabang Genat Rito Ditas

Pigulèk ni Watson Goodman

Libre—Gendi pahay
peshaluyen

GABANG GENAT RITO DITAS

“Gabang genat rito ditas” peshihemutan nu piganib sinulat thalù Diwata pu maya piguntay genat di dlénlén nga dlibru tu shamayà. Meturan huron su gempya penintulu-an sinulat su laksid regid thalù nu Diwata.

Su thalù nu Diwata minateng “Genat rito ditas” Dahus hin mahegabang tu pusong miguteman dahus dle hunen tu gmetiddú. Samà Su getaw gmegbisù, teliuran-nen su dusà, nggaten-nen si Jesus Christ meg-gbenwa di pusongan, dahus su dlemon sumalig genat di helon pusongan tu Kunutan Jesus Christ hin su gomun. Su Kunutan mepilala rin ryanin dahus hetamed nu dlemon sumalig genat di pusong. Hini su dyanan thalimà genat 1937, Dahus genda O pa regid megobal hini maheseselebu hepedimud duma O su Kunutan. Penengin hu ryanyu na sumudyut amo tu ryanin su gumon nandaw dahus Kunutan, Mba genda nyu pa thalima ay hyanin.

—Watson Goodman (1920-2002)

SU DLELAMAN NU DIWATA

Ugaid pinità nu Diwata rin ryanta su helalam en thandeng ryanta; su shenanana ta pa gbalrusa si Christ minatay shapap ryanta!

—Rome 5:8

Nandaw hini su gendaw muna tu gendaw nu Dlumpuk Linyusan. Misunan ni Jesus mà run myoma na su dyanghà mawà hyanin dini dunya dahus muli na tu Gamà. Hyanin pedlalam dlelayun tu nga getaw en dini dunya, dahus dlelamen en ilan sampay tu githeb en.

—John 13:1

“Hin i gembagel thandeng dlelaman hu getaw di nga phahat en

sà begay en i hetubù en shapap ryanlan.”

—John 15:13

Dahus genat rin ni Jesus Christ, su meseligan thuhasì, su phenge-nayan Gmulyataw-dlai, hyanin su mitubù migbwat genat tu hepatay dahus hyanin da rema su guhum nu nga garì di dunya. Linalam en ita, dahus pibyan tu hepatay en pilwas en ita genat tu nga dusa ta.

—Pilingasà 1:5

Shapap dlelamen thandeng nu Diwata su dunya muhà bigay en su gbuntung Gbatà en dlai, dari su dlemon sumalig ryanin gendi matay ugaid dun hetubù en me-thunay.

—John 3:16

Su gendà i helalam en gendi en sunan su Diwata, hagina su Diwata i dlelaman. Pinità nu Diwata su helalam en ryanta di gmà nini da-

lan nen: piwit en su gbuntung Gbatà en dini dunya, dari malap ta su hetubù pibyan ryanin.

—1 John 4:8, 9

SU THUPWAN NI JESUS CHRIST

Gendà i mahapemalaw run i hebegal nu pegedluren nu dyanta agama: Hyanin minggemaw di dlawas kilawan, mipétà hyanin gmetiddu pibyan tu Medlengaw, dahus minità hyanin nu nga getaw-langit shesuguen nu Diwata. Hyanin pimitwà tu helon nga gbansa, pitud hyanin dini dunya, dahus miwit ditu ditas dlangit.

—1 Timothy 3:16

Gendà pa twangay su dunya

dun na su Thalù; duma nu Diwata su Thalù, dahus Diwata su Thalù.... Su Thalù mibaluy getaw dahus migbenwa hyanin dini ryanita. Minità nami su dlengasan nen, mipenù dlasham bu gmetud. Hini su gbantug myalap en, hyanin su gbuntung Gbatà nu Gamà.

—John 1:1 dahus 14

Helonen hini mipegbetad dari metumanan su tinalù nu Kunutan pibyan tu ketauwan, “Su delaga

megbegat dahus meganan gbatà en dlai, dahus ingalan run Emmanuel” (gmahasud en, “Kini su Diwata duma ta”). —Matthew 1:22, 23

“Su Gamà bu inan selabuk ami.” —John 10:30

Simbag ni Jesus, “Myoget u na

din kelonan nyu, gendi mu pa regid mélala inan, Philip? Su mi-hétà ryanan mihétà ra rema tu Gamà. Muma sap teluen mu pa, ‘Pétà mu ryanami su Gamà’? Gendi a tà meturan, Philip, mà run inan tu u Gamà dahus su Gamà kini ryanan? . . .” —John 14:9, 10

SI JESUS, GBATÀ NU DIWATÀ

Su getaw memuhà mà run si Jesus Gbatà nu Diwata, pegbenwa su Diwata rin ryanin, dahus pegbenwa hyanin tu Diwata.

—1 John 4:15

Su getaw-langit shesuguen nu Diwata sumimbag, “Su Misenggay Medlengaw mangay rin rya-

nia, dahus su gbalahat nu Diwata tumenà ryania. Hini i shapap en su misenggay gembatà twagen Gbatà nu Diwata.” —Luke 1:35

Tumihaw ilan mengelaw, long nilan, “Alan lyagan mu ryanami, yaa Gbatà nu Diwata? Tà itu ngén mu na yami berasay ndà pa

homa su patut dyanghà hebaras ryanami?" —Matthew 8:29

Shegay en methalù, dun gabun medlyalyap miputus ryanlan dahus dun i dlagaw mithalù genat tu gabun: "Hini dyanan Gbatà gem-pulù thandeng ryanan, misuatan u ryanin—pekinégay nyu hyanin!" —Matthew 17:5

Tinalù ni Jesus ryanin, "Minità mu na hyanin (Gbatà nu Diwata), dahus hyanin i pephindà hini ryania nandaw." —John 9:37

Shapap su mipenù dalem nu dinyatan mitubù rin ni Christ, tu dyanin hapedlegetaw.

—Colossae 2:9

"Mahatag inan, su Gamà i mimilì ryanan bu sinugù en inan mangay dini dunya. Muma metihà nyu teluay mà run pingueluan hu su Diwata pù tinalù u inan su Gbatà nu Diwata? Mgà henà u peguléhen su nga galebek ni Amà, gendì amu pephetud ryanan." —John 10:36, 37

MIPILALA SI JESUS DITO RYANTA

Simbag ni Jesus, "Yamu getaw amu di shilung; ugaid inan, getaw u tu ditas. Yamu, genat amu dini

dunya, ugaid inan, henà u genat di dunya hini." "Talù u ryanyu su gmetud," simbag ni Jesus. "Gen-

dà pa pegbetaay si Abraham, ‘In-an dun na’.” —John 8:23 dahus 58

Tinalù nu dlibun ryanin, “Sunan hu merateng su Messiah, su hin pethwagen Christ. Samà hyanin mateng peguhiten nen ryanta helonen.” Simbag ni Jesus, “Inan hyanin, inan su pephindra ryania.”
—John 4:25, 26

Tinalù ni Jesus ryanlan, “Inan su phan mahagbegay hetubù. Su mangay rin ryanan gendì kalyali megutem; su mebenalan ryanan gendì kalyali honen.” —John 6:35

“Shegay kini u dunya, inan su gmerelag di dunya.” —John 9:5

Haguna maantu tinalù na sap

ni Jesus, “Talù u ryanyu su gmetud: inan su phintù byanan nu nga gibilibili.”
—John 10:7

Tinalù ni Jesus ryanin, “Inan su hengmilwasan dahus su hetubù. Su getaw mebenalan ryanan, pya sì matay hyanin, mpuli ra metubù.”
—John 11:25

“Pethwagen nyu inan Gmenintulù bu Kunutan, mihasugat amu, hagina inan da ran itu.”
—John 13:13

Simbag ni Jesus ryanin, “Inan su dalan, su gmetud bu su hetubù; gendà i mahangay tu Gamà, lumwal mayan ryanan.”
—John 14:6

SU NGA SEBAD GMAHASESELEBÙ PIGBETAD NI JESUS

Sinugù en su helon getaw menginghud tu shigbetanan; mandyari ginalap en su lima buk phan bu su dwà buk sherà, midlinghagà tu dlangit, dahus misha-lamat tu Diwata. Pimpeti nen su nga phan dahus bigay en tu nga tinintuluan nen, dahus su nga tin-intuluan i migbegay run pithung-hid tu helon getaw. Migelà meha-han su helon getaw dahus mihabesug ilan. Dahag tinimù nu nga tinintuluan su misawad phan, mipenù i sepulù bu rwà gbelanan. Gi-nitung su nga dlai huminan, dun lima ngibu ilan gendà heruma bi-

langay su nga dlibun bu su nga gembatà. —Matthew 14:19-21

“Apù,” simbag ni Simon, “segebi nami na methegel menggalebek ugaid gendà i myalap nami. Ugaid mbà maantu i thalù mu, lebuen hu i nga phuhet hini.” Linabù nlan su nga phuhet dahus gmelon i myalap nlan sherà, shungu na megerit su nga phuhet nilan. —Luke 5:5, 6

Dwà tawan dlai gbuta peging-hud dya gbelit dalan mirengeg nlan pegbayan si Jesus, miphun ilan methawag, “Gbatà ni David! Gmenintulù, helelat a ryanami!”

Migbeneng si Jesus dahus sinabinnen ilan. "Alan dlyagan nyu pegbetad u ryanyu?" pishak en ryanlan. Simbag nlan, "Gmenintulù, dlyagan nami puhaen mu su gma-

ta nami!" Milelat si Jesus ryanlan dahus dipenan nen su gmata nlan; sehutihà mihétà ilan, dahus migunut ilan ryanin.

—Matthew 20:30 dahus 32-34

SI JESUS CHRIST SU MIGBEBAYÀ DAHUS KUNUTAN

Shapap pibyan ryanin tiwang nu Diwata su helon gbinyasan mirealem tu dlangit bu di dibabawan nu dlupà, su métà bu su gendi métà nga gbinyasan, piruma run su nga gbalahat dlumininged, nga kunutan, nga guhum, bu nga gbagelal. Tiwang nu Diwata su gekleb dlupà bu dlangit pibyan rya-

nin dahus shapap din ryanin.

—Colossae 1:16

Pibyan ryanin mibal su helon nga gbinyasan; dahus ndà i run pya selabuk tu binal hitu henà pibyan ryanin.

—John 1:3

Diwata . . . ugaid hini mibinayà nga gendaw midlegelun hyanin ryanta pibyan tu dyanin Gbatà.

Pibyan din ryanin tiwang nu Diwata su dliwag dunya, hyanin i pimili nu Diwata mahahed tu helon gbinyasan mateng su githeb en.

—Hebrew 1:2

“Haguna maantu, su helon getaw Israel, subay mesunan nlan thandeng mà run hini si Jesus, su tinutuhan nyu tu gbansulang, binal hyanin Kunutan dahus Mesiah!”

—Nga Pigbetad 2:36

Shapap minatay si Christ dahus migbwat mitubù pulì dari hyanin mebal Kunutan nu nga pegitubù dahus nu nga mimatay.

—Rome 14:9

Patut seligan su Diwata, su Diwata tuminawag ryanyu mese-labuk amu tu dyanin Gbatà si Jesus Christ, dyanta Kunutan.

—1 Corinth 1:9

SI JESUS CHRIST GUHUM TU HELOHEN

Mandyari, yamu—muma sap uhumen nyu bu peshurian nyu su nga shama nyu pheginugut? Helon ta nawan mahapegindeg tu-

mubang tu gerapan nu Diwata, pù dari uhumen nen ita. —Rome 14:10

Ihagan hu yaa tu gunan nu Diwata dahus ni Christ Jesus,

hyanin su mohum tu helon getaw, tu nga pegitubù dahus tu nga mimatay: shapap tu dateng en puli rini bu shapap tu dyanin Pidlegerian, pinted u ryania.

—2 Timothy 4:1

“Samà merateng su Gbatà Getaw hyanin na i Garì, dahus uygagan nu nga getaw-langit sesuguen nu Diwata, meginghud hyanin tu pegeraban kinulesì en, dahus su helon getaw di dunya melimud tu gunan nen. Mandyari baren nen su nga getaw di dwà tumpuk, maantu gmechipat gbibili sibén nen su nga gibilibili genat tu nga kambing.”

—Matthew 25:31, 32

“Gendà i getaw uhumen nu

Gamà. Bigay nu Gamà tu dyanin Gbatà su helon gbayàbayà tu henguhum.”

—John 5:22

Haguna maantu, sumalà tu Gempya Guhiten phemitwaen hu, gmà nini i mpegbetad tu Gendaw samà su Diwata, pibyan rin ni Jesus Christ, uhumen nen na su helon mileldlud tu nga phihilan nu nga getaw.

—Rome 2:16

“Dahus sinugù en ryanami pemitwaen su gempya guhiten tu nga getaw, bu methanud ami mà run hyanin i tindù nu Diwata mebal guhum nu nga pegitubù dahus nu nga mimatay.”

—Nga Pigbetad 10:42

SU HESULEGÀ DITO LAK PIBYAN NI CHRIST

“Inan su phintù. Su getaw su-meled mayan ryanan, megon; su-meled bu lumyu hyanin dahus ma-hatun pengethaban nen.”

—John 10:9

Simbag ni Jesus ryanin, “Inan su dalan, su gmetud bu su hetubù; gendà i mahangay tu Gamà, lum-wal mayan ryanan.”

—John 14:6

“Has ma tinalù u ryanyu mematay amu, rin amu nga dusa nyu. Dahus mematay amu ra ran din nga dusa nyu, mbà gendi amu benalan mà run ‘Inan getaway Inan’.”

—John 8:24

Haguna hyanin migusay gumanap, mibal hyanin phun nu thu-

nay hesulegà nu helon sumalig ryanin.

—Hebrew 5:9

Ugaid pibyan tu bigay thulon dlasham nu Diwata helon nlan mi-betang gmetiddu tu ryanin pi-byan rin ni Christ Jesus, hyanin su mephelwas ryanlan.

—Rome 3:24

Has megaga nen, nandaw dahus dlelayun, gonay su nga mangay tu Diwata pibyan ryanin, hagina pegitubù hyanin sampay ndà i githeb en pephenenginengi hyanin tu Diwata sapap ryanlan.

—Hebrew 7:25

Su hesulegà metun lak din ryanin sala nen; shapap ndà i run i

dlén getaw di dliwag dunya, su ngalan nen bigay nu Diwata tu

kilawan, pibyan run megon ita.”
—Nga Pigbetad 4:12

SU HESULEGA DITO LAK PIBYAN NI CHRIST

Ugaid giwit amu dahus pigampù amu nu Diwata rin ni Christ Jesus, dahus binal nu Diwata si Christ mebal dyanta phendayan. Pibyan ryanin mibetang ita gmetiddu tu Diwata; mibal ita misenggay nga getaw nu Diwata dahus mihalwas ita.

—1 Corinth 1:30

Bigay en su dlawas en shaparyanta, dari megon nen ita genat tu helon gmelat bu balen nen ita nga getaw gmetilak hitu dyanin gahed sala nen dahus nga getaw

shyaha nlan su hegulék tu gempya.
—Titus 2:14

Dahus meruma su dlelyag pegbegay amu shalamat tu Gama, su migbal ryanyu mbantang mahalap tu gilas sinangù nu Diwata tu nga getaw en ditu hepedlegari nu gmerelag. Ginon nen ita genat tu thegel nu gmerelem dahus giwit en ita gmesibà tu dyalem pidlegerian nu dyanin gempulù Gbatà, hitu miphelwas rin ryanta, ginampun su nga dusa ta.

—Colossae 1:12-14

“Shapap su Gbatà Getaw minangay rini pulù penengon nen dahus gonen nen su nga getaw mi-beleng.”

—Luke 19:10

Mibegat ilan selabuk gbegu gbebat: “Patut mu lapen su dli-bru linulun dahus lupeten bu ukaen mu su nga thyap en. Hagi-

na binunù a, dahus pibyan tu dlasay hepatay mu misaluy mu mbaldyan nu Diwata su nga getaw genat tu sheselabuk thupwan, genat tu dlénlén nga thalù en, genat tu nga gbansa, dahus genat tu dlénlén i phalas phanit en.”

—Pilingasà 5:9

SU DUGÙ NI CHRIST MIHAPHYA RYANTA

Pibyan tu hepatay en ita nadaw mibetang gmetiddu tu Diwata; labi na, mbà maantu, i hegontu pibyan ryanin genat tu dlenget nu Diwata.

—Rome 5:9

Shapap pibyan tu hepatay ni Christ mihalwas ita, gmahasud en, su nga dusa ta ginampun na.

Gembagel thandeng su dlasham nu Diwata, hitu bigay en din ryanta gendà i malus halan run!

—Ephesus 1:7

Hagina sunan nyu ra alan hepulù nu dlagà binayad dari mahalwas amu genat tu hetubù gendà i phantag en mipemusahà

ryanyu nu nga gapuapù nyu. Su binayad hini henà gbinyasan manin philak atawa gbulawan medlat da; mihalwas amu pibyan tu gbalalagà dulang ni Christ, hyanin maantu nati gibilibili gmesihad dahus ndà i shusyan run.

—1 Peter 1:18, 19

Ugaid mbà megbenwa ita tu gmerelag—maantu hyanin tu sheled nu gmerelag—mandyari ita, dun heselabuk ta tu nga duma ta, dahus su dugù ni Jesus, dyanin Gbatà, mahatilak ryanta genat tu helon dusa ta.

—1 John 1:7

Hagina hini gmetud, dlabi na gmelon i metubus pibyan tu dugù ni Christ! Pibyan tu methunay

Medlengaw bigay en su dlawas en maantu gbwis guminanap tu Diwata. Su dugù en mebal en gmetilak su nga phihilan ta genat tu nga gulék ndà i hepantag en, dari metamuy ta su pegitubù Diwata.

—Hebrew 9:14

“Hini su dugù u, su thumbuk tu shamayà nu Diwata, su dugù u mibunag shapap tu gmelon getaw andun da mampun su nga dusa.”

—Matthew 26:28

Ugaid henà lak hitu; pedlelyag ita tu Diwata pibyan tu dyanta Kunutan si Jesus Christ, hyanin su mihaphya ryanta tu Diwata mibal ita nga phahat en.

—Rome 5:11

HEGON PIBYAN TU HESALIG RINI CHRIST

Shapap tu dlasham nu Diwata
migon amu pibyan tu heshalig.
Henà shapap tu pigulék nyu,
ugaid thulon nu Diwata, dari ndà i
run i getaw balen nen gandyà en i
hegon nen. —Ephesus 2:8, 9

Na, hagina mibetang ita gme-
tiddu tu Diwata pibyan di hesalig,
dun i hepya ta tu Diwata pibyan
tu dyanta Kunutan si Jesus
Christ. —Rome 5:1

Shapap mbà miselabuk ita rin
ni Christ Jesus, gendà ra i hepan-
tag en su hinunditan bu su gendà
hunditay; hin dun hepantag en su
heshalig menggalebek pibyan di
dlelam. —Galatia 5:6

... “Salig a tu Kunutan si Jesus
dahus megon ha—yaa bu su sen-
langan mu.” —Nga Pigbetad 16:31

Hagina su helon gbatà nu
Diwata mahagaga dumag tu
dunya. Dahus hini i dalan nen pi-
byan tu heshalig ta pimendagan
ta su dunya. —1 John 5:4

Muhà pishak nilan ryanin,
“Alan ma i pegbetaren nami dari
penggalebek nami su gulék nu
Diwata?” Simbag ni Jesus, “Hini
su gulék phaut nu Diwata ryanyu:
salig amu tu sinugù en.”

—John 6:28, 29

Helonen hini misulat dari me-
phetud amu mà run si Jesus

hin su Messiah, su Gbatà nu Diwata, dahus pibyan tu hesalig

hini merunan amu hetubù pibyan tu dyanin ngalan. —John 20:31

SU HELELAT NU DIWATA

Haguna maantu, subay meshibelù ita, dahus mundas ita mephesempel tu kinulesì nu Diwata, ditu dun su dlasham. Ditu mahalap ita helelat dahus mahatun ita dlasham mahagabang ryanta tu dyanghà kabus ini rin ryanta.

—Hebrew 4:16

Meshalamat ita tu Diwata bu Gamà... su Gamà gmelelat, su Diwata phigenatan tu helon nga gabang!

—2 Corinth 1:3

Meshalamat ita tu Diwata Gamà nu dyanta Kunutan si Je-

sus Christ! Shapap tu gembagel helelat en, bigay en ryanta su gbegu hetubù pibyan tu hebwat en rin ni Jesus Christ pitubù pulì genat tu nga mimatay. Su hetubù en pulì genat tu nga mimatay i pephepenù ryanta hederama pegitubù.

—1 Peter 1:3

Shapap su Gbatà Getaw minateng dini gaway en gumon tu nga mihabeleng. “Alan i phihilan nyu? Alan i pegbetaren nu getaw dun megatus gibilibili nen dahus selabuk mebeleng? Legahen nen

ma su syam pulù bu syam
phengathab tu dungus dahus
engén nen da penengaway su mi-
beleng gbilibili. Mbà mesehung en
ini, talù u ryanyu, lumabi i he-
lelyag en di selabuk gbilibili hini
dlabi pa tu helelyag en dya syam
pulù bu syam gbilibili gendà me-
beleng. Maantu ra i dalan nen su
Gamà nyu tu dlangit gendi en lya-
gan dun pya lak selabuk tu nga

gméhà gembatà hini mebeleng.”
—Matthew 18:11-14

Ginon nen ita. Henà pù dun mi-
pegulék ta nga gempya, ugaid ha-
gina tu dyanin helelat ginon nen
ita, pibyan tu Misenggay Me-
dlengaw, hyanin migbegay ryanta
tu gbegu hegigetaw dahus gbegu
hetubù pibyan tu hogas en ryan-
ta.

—Titus 3:5

KHELYAG NU DIWATA MANGAY ITA TU RYANIN

“Myoma su gendaw nu dlum-
puk, sinugù en su gulipen nen
mangay tu nga pingenggat dahus
teluen nen ryanlan, ‘Dining hamu

angay, pù mibelantang na su
dahul!’”

—Luke 14:17

Su Medlengaw bu su Dlibun
Pegbeliin mithalù, “Dining ha

angay!" Dahus su helon maha-renggeg, subay teluen nen da rema, "Dining ha angay!" Dini angay, én su konen; tabuk nyu su thubig mahagbegay hetubù thulon tu dlemon mahalyag run.

—Pilingasà 22:17

Na, kini ami na, shapap rin ni Christ pethalù ami, manin su Diwata na i pepengayuk ryanyu pibyan ryanami. Pephengengi ami shapap rin ni Christ: bwang nyu su Diwata balen nen yamu nga phahat en, henà na nga ngusù en!

—2 Corinth 5:20

Su kulimpusan gendaw nu dlumpuk hitu na su thehenan nen, gendaw hitu migindeg si Jesus

dahus mithalù gmetenug, long en, "Su getaw konen mangay hyanin dini ryanan minum." —John 7:37

Mbà minità ini ni Jesus, linge-tan hyanin dahus tinalù en ryanlan, "Bwang nyu su nga gembatà mangay rini ryanan, dahus ndì nyu ilan pegendiay hagina su Pid-legerian nu Diwata dyan nu nga manini hini." —Mark 10:14

"Angay amu rin ryanan, su he-lon nyu binungas megbaba tu gembegat dlulan nyu, dahus pole-lin hu yamu." —Matthew 11:28

Tinalù ni Jesus ryanlan, "Gu-nut amu ryanan, balen hu yamu medlam nga getaw." —Mark 1:17

HENA HELON GETAW GBATÀ NU DIWATA

Hini su gmetahapala pigbiraan nu nga gbatà nu Diwata bu nu nga gbatà nu Dlatnawà: su getaw gendi en peguléhen su sumugat, atawa gendi en lelamen su shamataw en, hyanin henà gbatà nu Diwata.

—1 John 3:10

Su dlemon pegegahen nu Medlengaw nu Diwata ilan gbatà nu Diwata. Shapap su Medlengaw bigay nu Diwata ryanyu gendi en balen yamu gulipen dahus gendi en yamu balen mendek; sanghalì itu, su Medlengaw balen nen yamu nga gbatà nu Diwata, dahus pibyan tu gbalahat nu Medle-

ngaw methawag ita tu Diwata, “Amà! Amà u!” —Rome 8:14, 15

Dari gmongangen bu gmetilak maantu miginéhen nga gbatà nu Diwata, pegbenwa di dunya hini nga getaw en gmaharupang bu nga gbalarusa. Subay sumyag amu tu geletelet nilan maantu nga gbitun gmesulà tu dlangit.

—Philippi 2:15

Dahus gmà nini su tinalù nu Kunutan, “Subay waay nyu ilan, dahus senggay amu genat rylan. Gendi nyu pethunungay su gbinyasan henà gmetilak, dahus telimaen hu yamu. Inan i mbal gamà nyu, dahus mbaluy amu

nga gbatà u dlai bu nga gbatà u dlibun, thalù nu Kunutan Gbala-hatan.” —2 Corinth 6:17, 18

Ugaid, dun da sap tuminalimà

ryanin, dahus suminalig ryanin; haguna maantu bigayan nen ilan hepatut mbal nga gbatà nu Diwata.

—John 1:12

SU MITHALÙ NU DIWATA MAHATAG TU HEGINUM

Gmelintang su peguléhen nu dinyatan kilawan. Mepétà ini din dlelog, din gmahalemùlemù, dahus din nga golaola gmahatampaliasà; din hetamuy nga dlerawan dahus hegbebelyan. Hin nga getaw medlengusù dahus megbunù ilan; melibegun ilan, medlenget ilan, dahus mephelelabi ilan. Meshibaysibay ilan bu medlénlén ilan megumpungumpung; gmahasi-gi ilan, megbebolek ilan, mephe-

tuyang ilan tu nga dlatlat kelyag nu dlawas bu hegbolò di pheginuman, dahus dlén pa nga go-laola mishama rini. Talù u ryanyu nandaw maantu ra surin: su nga getaw megbetad run i nga golaola gmà nini gendi mahaseled tu Pidlegerian nu Diwata.

—Galatia 5:19-21

Pesibaen ta su phalibasa ta, maantu nga getaw tu dyanlan phalibasa mebantang tu gendaw;

gendà i hegbolò atawa hegbebulek, gendà i helelog atawa hedlelemù, gendà i hegbebunù atawa hesesigyay. Ugaid lap nyu su nga gbesi nu Kunutan si Jesus Christ, dahus sugatay nyu na i hethulithud nyu tu nga golaola gmaharusa, pù dari lak mebesugan su nga dlyagan nen.

—Rome 13:13, 14

“Shapap hyanin mebal gempulu getaw tu gunan nu Kunutan.

Hyanin subay gendì minum gem bisa atawa gmeseheg ginumen. Genat tu hegitetaw en pinù na hyanin nu Misenggay Medlenngaw.”

—Luke 1:15

“Pethulihay nyu i dlawas nyu! Gendì amu lak pethantu pegimum bu dlelayun lak phemihilen nyu su hetubutubuan di dunya hini, pù metehawan amu mateng i Gendaw Hepuli nu Kunutan, mbà henà nyu phemihilen.” —Luke 21:34

PENGULISEG TA KHULANG PA REGID

Simbag ni Jesus, “‘Subay lelamen mu su Kunutan dyania Diwata gelagelà mu run su

phusung mu, gelagelà mu run su nyawa mu, dahus gelagelà mu run su phihilan mu.’ Hini su gempulu

thandeng bu gmetas tu helon phinteran.” —Matthew 22:37, 38

... “Gempya Gmenintulù, alan i patut pegbetaren hu dari malap u su hetubù methunay?” “Mumatawag mu ryanan gempya?” pi-shak ni Jesus ryanin. “Ndà i run i selataw getaw gempya lumwal lak su Diwata. Sunan mu su nga phinteran: ‘Ndì a bunù; ndì a ped-lehelyag; ndì a pedaw; ndì a peg-balus; ndì a pedlimbung; gerabay mu si amà mu bu si nà mu.’” Tin-alù nu dlai hya, “Gmenintulù, helon nga phinteran hini tinuran hu genat pa heleburay u.” Pime-thehan pengenlengay hyanin ni Jesus mirunut su helalam en da-

hus tinalù en. “Selabuk lak gbin-
yasan kulang ryania. Tung ha na
peshaluy mu su helon gimu mu
dahus begay mu su philak tu nga
gmésihinan, dahus yaa merun i
gaus mu tu dlangit; mandyari di-
ning ha, dahus pegunut a rya-
nan.” Mbà mirenggeg nu dlai ma-
nini i tinalù ni Jesus, milikmed su
kibalay en dahus minawà rya
gmeremeng hyanin, hagina sug-
gat helon gaus en. —Mark 10:17-22

Dahus hini su pithuhesian: Bi-
gay nu Diwata rin ryanta su me-
thunay hetubù, dahus hini hetubù
phun nen tu dyanin Gbatà; én i ge-
taw mihalap tu Gbatà din ryanin

su hetubù hini; én i getaw gendà en halap su Gbatà nu Diwata

gendà ryanin su hetubù.

—1 John 5:11, 12

GENDI AMO HELIMBUNGAY

Gendi nyu pedlimbungay su dlawas nyu; ndà i run i getaw mahalimbung tu Diwata. Su getaw megani nen su ra girek en.

—Galatia 6:7

Nga gbatà u, gendi nyu bwan-gay dun pya selataw medlimbung ryanyu! Su getaw megulék tu sumugat hin su getaw gmetiddu, maantu ra ni Christ hin su gmetiddu. Su getaw lolosen nen su herusa nen pidlegetawan nu Dlatnawà, hagina su Dlatnawà

gbalarusa genat pa tu pipunpu-nan. . . .

—1 John 3:7, 8

Sunan nyu mà run su nga du-pang gendi mahalap thendaan tu hepedlegari nu Diwata. Gendi nyu limbungay i dlawas nyu; nga ge-taw gmaha lat i thabyat nlan atawa gmentamuy nga dlerawan atawa nga medlehelyag tu shawa du-ma nen atawa nga dlelogen atawa nga meddaw atawa nga gibegen atawa nga gbebulehen atawa pekutiyutin nen i nga duma nen atawa nga gmenulis—ndà i run

ryanlan hini mahalap thendaan
nen tu hepedlegari nu Diwata.

—1 Corinth 6:9, 10

Gendì nyu bwangay dun i getaw
medlimbung ryanyu meruma su
gbunegbunegan nga thalù; mi-
shapap di nga gbinyasan gmà nini
su dlenget nu Diwata merashang
tu nga getaw gendì meginugut
ryanin.

—Ephesus 5:6

Gendì nyu limbungay i dlawas
nyu pù maya pekinegan nyu su
thalù en. Subay ra pegbetaren
nyu itu dlelayun. —James 1:22

Mbà dun i getaw phemihilen
nen gmetas hyanin, asal sap
gендà i run da hyanin i hepantag
en, hin lak pedlimbungan nen su
dlawas en. —Galatia 6:3

SU DUSA MAHAGWIT HEPATAY

Su dusa sumiled dini dunya pi-
byan tu selataw getaw, dahus su
dusa nen mihagwit hepatay. Hire-
shuan nen, midlebet su hepatay
tu helon gbansa kilawan, hagina
su helon nga getaw mirusa.

—Rome 5:12

Muhà su gmelat phemihilen nen
methelipunan dahus megbatà du-
sa; dahus su dusa mbà meginehen
na megbatà hepatay.

—James 1:15

Sà su phihilan nyu mipendeg nu
dinyatan kilawan hereshuan nen i

hepatay; sà su phihilan nyu mipedeg nu Medlengaw nu Diwata hereshuan nen i hetubù dahus helinaw. Has ma su getaw mebal ngusù nu Diwata sà su phihilan nen mependeg nu dinyatan kilawan; shapap gendi ini mengunut tu phalinta nu Diwata, dahus su gmetud, gendi en na ran megaga pengunutay itu. —Rome 8:6, 7

Alan i guntung myalap nyu genat tu nga gbinyasan pigbetad nyu teganà hitu gmesipeg amu na run nandaw? Hireshuan nu nga gbinyasan hitu su hepatay!

—Rome 6:21

“Hagina gmuran mu hini mina-

tay na, ugaid nandaw mitubù hyanin; mibeleng na, ugaid nandaw mitun, subay na ran medium-puk ita dahus medlamilami ita.”

—Luke 15:32

“Ugaid su nga gmahatalaw, su nga gmentipu, su nga dlelogen, su nga gmemunù, su nga gmenlai bu gmenlibun, su dlemon gulék en i hembalikmata, su mentamuy nga dlerawan, dahus su helon nga gbelusen—hin pebenwanan ryanlan su danaw pedligà gapuy bu shendawa, hitu su herwà hepatay.”

—Pilingasà 21:8

Shapap byaran nu dusa su shuhay en-su hepatay

—Rome 6:23

DINAG NI CHRIST SU HEPATÁY

Unuten tu gmiriwata heseng-gay en, mipélala hyanin Gbatà nu Diwata duma su gembagel gbala-hat pibyan tu hebwat ryanin pitubù pulì genat tu hepatay.

—Rome 1:4

Dlwat en teluay ini, migbeshay, long en, “Lazarus, lyawa a!” Luminyawa su gminatay, nga kemet en bu nga geshud en liniberan shaput dahus miputus phenepeten su gmulù en. Tinalù ni Jesus rylan, “Ubaray nyu hyanin, petuyang nyu hyanin panaw.”

—John 11:43, 44

Mandyari miphesempel hyanin bu dipenan nen su dlungunan da-

hus migbeneng su nga getaw peg-belanting run. Tinalù ni Jesus, “Gbatà-henahan! Talù u ryania, pegbwat a!” Micinghud hya gminatay dahus mithalù

—Luke 7:14, 15

“Dlelamen u nu Gamà hagina melyag u begay u su hetubù u dari mawì u ra pulì. Gendà i getaw maha-lehat tu hetubù u genat ryanan. Kandilian gina u i hebegay u run. Dun i gbayàbayà u megbegay run, dahus dun da rema i gbayàbayà u mawì run. Hini su sinugù ni Amà u peguléhen hu.” —John 10:17, 18

“Inan su pegitubù! Minatay u,

ugaid nandaw pegitubù u sampay tu ndà i githeben. Dun i gbayà-

bayà u tu hepatay dahus tu dlupà nu nga mimatay.” —Pilingasà 1:18

SU NGA PHINTERAN NU DIWATA

Simbag ni Jesus, “Hini su mi-labi gempulù tu helon nga phinteran: . . . ‘Su Kunutan dyanta Diwata hin laksu selabuk Kunutan. Subay lelamen mu su Kunutan Diwata mu meruma su helon phusung mu, meruma su helon kalag mu, meruma su helon phihilan mu, dahus meruma su helon she-heg mu.’ Su herwà gempulù phinteran hini: ‘Subay lelamen mu su samataw mu maantu dlawas mu.’ Ndà i run i dlén phinteran lumabi

hepulù di dwà hini.” —Mark 12:29-31

Dlelamen hu yamu maantu he-lalam ryanan ni Amà, dahus pethunay amu di dlelamen hu. Mbà tumanan nyu su nga phinteran hu, mahathunay amu di dlelamen hu, maantu pethumanan hu su nga phinteran ni Amà bu mithunay u tu dyanin dlelamen. “Tinalù u ini ryanyu, dari merin ryanyu su dleyag u, dahus dari megusay gumanap su dleyag nyu. Hini su

phinteran hu: pekilelamay amu,
maantu helalam hu ryanyu.

—John 15:9-12

“Su gbegu phinteran begay u
ryanyu: pekilelamay amu. Maan-
tu helalam hu ryanyu, maantu ra
rema, yamu subay pekilelamay
amu.”

—John 13:34

“Gmenintulù,” pishak en, “alan
gempulù thandeng phinteran mi-
ralem tu Phalinta?” Simbag ni Je-
sus, “‘Subay lelamen mu su Ku-

nutan dyania Diwata gelagelà mu
run su phusung mu, gelagelà mu
run su nyawa mu, dahus gelagelà
mu run su phihilan mu.’ Hini su
gempulù thandeng bu gmetas tu
helon phinteran. Su herwà gmetas
da rema phinteran mishama ra
run: ‘Subay lelamen mu su shama-
taw mu maantu ra helalam mu tu
dlawas mu.’ Su thibuk Phalinta ni
Moses bu su nga thintuluau nu
nga ketauwan gishud di dwà hini
phinteran.”

—Matthew 22:36-40

GENDI A MAHAGEDLUD TU DIWATA

“Su Diwata hyanin i tumiwang
tu dunya bu tu helon gbinyasan
miralem run, hin su Kunutan tu

dlangit bu tu dlupà, dahus gendi
hyanin medalepà din nga gmaha-
bagel simbahana tinuhod nu ge-

taw. Henà ra rema dun i kabus ryanin pù maya begayan nu nga getaw pibyan tu hetheleru nlan ryanin, shapap hyanin na i pegbegay tu hetubù dahus tu gina dahus tu helon pa nga dlén gbinya-san mesyaha nu helon getaw. Genat tu selataw getaw tiwang en su helon gbansa nu nga getaw, dahus pitubù en ilan pibenwa ilan tu dibabawan nu dliwag dunya. Hyanin na i mishibà medlegatà tu thehenan nu nga dyanghà, dahus su githeb nga dulunan nu nga gbenwa dalepaan nilan. Pigbetad en ini dari penengon nlan hyanin, dahus mabù mesehung nilan da hyanin mbà medlibutlibut ilan phepeng-hapen nlan arin hyanin. Ugaid

su Diwata henà gmelayù tu she-selataw ryanta; maantu dun i tuminalù run, ‘Din ryanin mitubù ita dahus mikuleg ita bu phegitubù ita.’ Maantu ra rema su tinalù nu sebad nu nga phanday megbayuk ryanyu, ‘Ita rema nga gbatà en da.’ ” —Nga Pigbetad 17:24-28

Dahus dun pa sap miralem tu sinalat thalù Diwata, “Sunan nu Kunutan mà run su nga phemihi-len nu nga phanday ndà i run i phantag en.” —1 Corinth 3:20

Has gendì amu shadya tenà gu-human tu pya alan taway, sà ndì pa mateng su suminugat dyanghà. I pingitheban guhuman subay medlanghad sampay mera-

teng pulì rini su Kunutan; hyanin megwit run tu gmerelag su pigbuni tu gmerelem dahus bwasan nen su pigedlud nga gaway miralem tu phihilan nu nga getaw. Mandyari dyarya selataw malap en genat tu Diwata su phegyà mbantang rin ryanin.

—1 Corinth 4:5

Dahus tu gunan nu Diwata ndà

THUNAY GBARAS TU NGA HANA PEGINUGOT

“Su Gbatà Getaw suguen nen su nga getaw-langit shesuguen nen ngén nlan awaay genat tu dyanin Pidlegerian su helon mahasabà tu nga getaw merusa, dahus helon

i run i gulék gmeledlud; helon gbinyasan tiwang mipuhà bu mibwasan tu nga gmata nen. Dahus ditu ryanin su helon ta nawan mahapegbegay gmesibà gitungan tu helon pigulék ta. —Hebrew 4:13

“Shapap gendà i pethebunan mbà gendi mbwasan, dahus gendà i pegbunin mbà gendi medenegg.”

—Luke 8:17

dlén pa nga menggolaola gmelat, dahus tiphuen ilan tu midanawranaw dligà gapuy, ditu memegayad ilan bu pengitheben nlan i ngisi nlan.” —Matthew 13:41, 42

Ugaid su nga dlangit bu su dlupà pegitaan ta hini nandaw sinangù pibyan tu mishama thalù nu Diwata, degid peglatan nawan pebyan di gapuy. Ilan hini tinagù shapap tu gendaw samà uhumen na dahus pedlatan na su nga getaw gendi mendiwata. —2 Peter 3:7

Helesayan nlan su gbaras tu thunay hebinasa, awà ilan genat tu gerapan nu Kunutan dahus genat tu pegbantug sheheg en.

—2 Thessalonica 1:9

“Mbà su selabuk kemet mu atawa selabuk geshud mu mahasabà ryania mahapuli a tu gbinayà mu, phed mu itu dahus pedilak mu! Tumù pa sumeled a tu hetubù ndà

i selabuk kemet mu atawa selabuk geshud mu batul dwà buk kemet mu bu dwà buk geshud mu pedilahen ha sap tu gapuy gendi kalyali paleng.” —Matthew 18:8

“Haguna maantu, nga getaw hini, pwit ilan tu gbaras gendà i githeb en; su nga getaw gmetiddu mahangay tu hetubù methunay.”

—Matthew 25:46

Én i getaw gendà mesulat i ngalan nen tu dyalem dlibru nu nga pegitubù pidilak tu danaw gapuy.

—Pilingasà 20:15

Su dlenget nu Diwata minità pedateng genat tu dlangit pethenà tu helon dusa bu dupangan nu nga getaw.... —Rome 1:18

PEDATENG HENGUHUM—GUHUMAN RIN GUNAN

“Hagina dun na i tindù en gendaw uhumen nen su dliwag dunya di gmeledeng guhuman, pibyan tu selataw getaw pimili en. Migbegay hyanin phetatà en tu helon nga getaw pibyan tu hebwat en pitubù en pulì i dlai hitu genat tu hepatay!” —Nga Pigbetad 17:31

Dahus sunan nu Diwata gebangay genat tu nga shashat nlan su nga getaw gmetiddu tu Diwata dahus sunan nen da rema senguay su gbaras en tu nga gmelat getaw sampay tu Gendaw Hohum.

—2 Peter 2:9

Su gaway muma su dlelaman pegbalen megusay gumanap din

ryanta, pù dari méges ita mateng su Gendaw Hohum; dahus malap ta i héges hitu hagina su hetubù ta rini dunya mishama tu hetubù ni Christ.

—1 John 4:17

Helon getaw subay matay mén-san, dlwat itu uhumen hyanin nu Diwata.

—Hebrew 9:27

... Su nga mimatay ginuhum il-an sumalà tu pinggalebek nlan, su misulat tu nga dlibru hitu.

—Pilingasà 20:12

Shapap helon ta subay maharangà tu ni Christ, dari uhumen nen su dyarya. Su sheselataw malap en su mpatut thandà en, sumalà tu helon gbinyasan pingga-

lebek en, . . . shegay en pegitubù.

—2 Corinth 5:10

Haguna maantu, su helon ta na-

wan subay mahapegbegay gitungan tu Diwata mahatag tu hetubù en.

—Rome 14:12

SU DLASHAM NI JESUS CHRIST

Ugaid su dwà tawan hitu gendà peshama, hagina su thulon bigay nu Diwata henà maantu dusa ni Adam. Gmetud gmelon nga getaw minatay shapap tu dusa nu selataw getaw hitu. Ugaid su dlasham nu Diwata mahalabi pa mpulù genat ritu, maantu ra rema su thulon bigay en tu gmelon nga getaw pibyan tu dlasham nu selataw getaw hitu, si Jesus Christ.

—Rome 5:15

Has ma, henà ini myalap tu

lyagan atawa tu galebek nu getaw, ugaid tu lak hesangù nu Diwata.

—Rome 9:16

... “Su Diwata matu tu gmandyà, ugaid begayan nen dlasham su nga gembabà i gmalatabat en.”

—1 Peter 5:5

Sunan nyu su dlasham nu dytanta Kunutan si Jesus Christ; su na hegausgaus en, binal en su hepupus en pù phepya rin ryanyu, dari medlegaus amu pibyan tu hengmisihin nen.

—2 Corinth 8:9

Meshalamat ita tu Diwata
shapap tu bigay en gendà i dlagà
en.
—2 Corinth 9:15

...Ugaid arin middlehelon run su
dusa, dlabi sap middlehelon ritu su
dlasham nu Diwata. Haguna
maantu, sà su usa midleguhum
pibyan di hepatay, su rema dla-
sham nu Diwata midleguhum pi-
byan tu hetiddu, legen nen ita

tu hetubù methunay pibyan tu
dyanta Kunutan si Jesus Christ.
—Rome 5:20, 21

Dahus gmesheg thandeng su
thintuluau pimitwà nu nga sheli-
gan mahatag tu hegbat hetubù
puli nu Kunutan si Jesus, dahus
suggat helon phengumpya linu-
rus nu Diwata rin ryanlan.

—Nga Pigbetad 4:33

HEGBISHÙ

“Pimaantu na nu Diwata su nga
gendawan hitu su gendà pa mete-
leru nu nga getaw ini, ugaid nan-
daw peshuguen nen su helon nga
getaw di arinarin mephalin.”

—Nga Pigbetad 17:30

Henà! Talù u ryanyu, mbà ya-
mu, gendì amu mephalin, helon
nyu matay maantu dalam hepatay
nlan.
—Luke 13:3

“Waay nyu su nga golaola nyu
gmaharusa,” tinalù en, “hagina

gmesempel na su Hepedlegari nu Diwata!"

—Matthew 3:2

Simbag ni Peter ryanlan, "She-selataw ryanyu subay waay nyu su nga dusa, pulì amu tu Diwata, dahus pephebaptays amu tu ngalan ni Jesus Christ, dari mampun su nga dusa nyu; dahus malap nyu su thulon nu Diwata, su M-senggay Medlengaw".... Has ma, pephalin amu dahus pulì amu tu Diwata, dari leknasan nen su nga dusa nyu.

—Nga Pigbetad 2:38; 3:19

Shapap su demengan hitu gina-mit nu Diwata mihaegwit hepha-lin nu getaw maleg tu hegong-nen—dahus ndà i hepegbishù en

run! Ugaid su demengan lak din kinilawan gmahapatay.

—2 Corinth 7:10

"Gmà nini i dalandalan nen, talù u ryanyu, dun i hapeshaya tu dlangit shapap tu selataw gbalarusa mephalin, labi pa i hapedleyag nlan tu syam pulù bu syam nga getaw gmahongangen su long nlan run gendì ilan na hambat mephalin."

—Luke 15:7

"Gmà nini i dalandalan nen, talù u ryanyu, meshaya su nga ge-taw-langit shesuguen nu Diwata shapap tu selataw gbalarusa miphalin."

—Luke 15:10

SU GAMPUN NU DUSA

“Mbà empunen nyu su nga dlad pigbetad ryanyu nu nga duma nyu, empunen amu ra rema nu Gamà nyu tu dlangit.”

—Matthew 6:14

Minità ni Jesus su hebagel nu shalig nilan, tinalù en tu dlai me-gansil, “Dyanan gbatà, su nga du-sa mu myampun na.” —Mark 2:5

“... Subay mesunan nyu dahus mpagetenget di gina nyu mà run pi-byan rin ni Jesus mipemitwà ryanyu su thintuluan mahatag tu gampun tu nga dusa Gintù hyanin nu Diwata pininghud tu rapit dlintu nen binal en Kunutan dahus Gumon, dari mebegayan

dyanghà su getaw Israel me-phalin dahus mampun su nga du-sa nlan.” —Nga Pigbetad 13:38; 5:31

“Pekineg a! Pegindeg u tu gbe-ngawan phintù bu phengeluthuk u; mbà dun i maharengeg tu dla-gaw u dahus puhaen nen su phintù, sumeled u tu gbalay en dahus human u sumalu u ryanin, dahus sumalu hyanin ryanan.”

—Pilingasà 3:20

“Dahus tu ngalan nen su thintuluan mahatag tu hephalin dahus su gampun tu nga dusa subay pemitwàen tu helon nga gban-sa, pepfunan tu Jerusalem.”

—Luke 24:47

... Tinalù ni Jesus, “Gendi u rema yaa uhumen binesan. Tung

ha na, ugaid gendi mu na pegbeta-ray pulì su gmaharusa.” —John 8:11

HESHWAY GENAT TU KILAWAN

Hagina pilingasà nu Diwata su dyanin dlasham shapap tu hegong tu helon getaw. Su dlasham hitu migagi ryanta mà run waan ta su hetubù henà tu Diwata bu kelyag kinilawan, dahus tu hependeg tu gina, tu hetiddu, bu tu hetubù tu Diwata dini dunya. —Titus 2:11, 12

Dlelayun petahenà nyu su phihilan nyu tu nga gbinyasan ditu, henà tu nga gbinyasan di dibabaw nu dlupà hini. —Colossae 3:2

Gendà i balan nyu tu nga getaw phenggelebehen nlan su nga gendà i phantag en hitu dyan nu gmerelem. Sanghalì itu, wit nyu ini tu dlyu ritu gmerelag. —Ephesus 5:11

Gendi nyu lelamay su dunya atawa su nga tingintingin dyan nu dunya. Mbà dlelamen nyu su dunya, gendà i run i dlelamen nyu tu Gamà. Su helon gbinyasan dyan nu dunya—su nga gmaharusa dlyagan nu dlawas, su helon

métà nu getaw bu mayak run, da-hus su helon dini dunya mandyà run su getaw—ndà i run i selabuk run phigenat tu Gamà, helonen hini phigenat tu dunya.

—1 John 2:15, 16

Yamu nga getaw gendì meseligan! Ndi nyu sunan su hephelwit tu dunya ngusù nu Diwata? Su getaw melyag mephelwit tu dunya mibal hyanin ngusù nu Diwata.

—James 4:4

Haguna maantu, dyanan nga phated, shapap tu gembagel hele-lat nu Diwata rin ryanta, penengin hu ryanyu, Begay nyu su hetubù nyu tu Diwata maantu du-lang pegitubù, pitanud bu sing-

gay tu dyanin gulék dahus metali-mà thandeng tu ryanin. Hini su gmetud hesudyut patut begay nyu tu Diwata. Gendì amu ayun bu pederuma tu nga phaladyaan di dunya hini, ugaid bwang nyu su Diwata megbegu tu hetubù nyu pibyan tu hegusay palin nu phihi-lan nyu. Mandyari megaga nyu su hesun nyu tu kelyag nu Diwa-ta—alan su gempya, dahus su mesuatan run hyanin, dahus su guminanap.

—Rome 12:1, 2

Ndì amu peshelabuk di gulék tu nga henà pheginugut, pù gendì itu sumugat. Megendun i hepegayun nu gempya ri gmelat? Megendun i heshelegen nu gmerelag di gmere-lem?

—2 Corinth 6:14

SU GBEGU GIGETAW

“... Inan minangay u rini meruhan ilan hetubù, su hetubù migusay.”
—John 10:10

Sunan nyu si Christ gmetiddu; has, patut mesunan nyu, mà run su dyarya hitu peguléhen nen alan su sumugat hin su gbatà nu Diwata. Sunan ta ndà i run gbatà nu Diwata pegithuran nen su dusa, hagina su Gbatà nu Diwata i pegipat ryanin, dahus su Selataw Gmelat gendì en mepedlatan hyanin.
—1 John 2:29; 5:18

Sà su getaw miselabuk na rin ni Christ, mibaluy na hyanin gbegu getaw; su dan gbetad en myawà

na, migbegu na su hetubù en.

—2 Corinth 5:17

Simbag ni Jesus, “Talu u ryania su gmetud: ndà i getaw mahétà tu Pidlegerian nu Diwata lumwal pegbetaen hyanin pulì.” —John 3:3

... Ugaid mitilak amu na genat tu dusa nyu; mipetanud amu na tu Diwata; mibetang amu gmetiddu tu Diwata pibyan tu Kunutan si Jesus Christ dahus pibyan tu Medlengaw nu dyanta Diwata.

—1 Corinth 6:11

Hagina yamu pigbatà amu puli henà pibyan tu getaw, ugaid pibyan tu pegitubù dahus methunay thalù nu Diwata. —1 Peter 1:23

MINATAY RIN SALÀ—MITUBU RINI CHRIST

Su teganà minatay amu di hengmiriwata nyu shapap tu hendamyas nyu dahus tu nga dusa nyu. Tu hehunay ta tu ni Christ Jesus migbwat ita pitubù en ita pulì dari medleguhum ita duma ta si Jesus ditu shulegaan.

—Ephesus 2:1 dahus 6

Ditu gbansulang linulan ni Christ tu dyanin dlawas su helon nga dusa ta, dari gendì ita na merusa dahus meniddu ita tu ryanin. Pibyan tu nga gangel en myolian amu.

—1 Peter 2:24

Biwat amu mitubù amu pulì du ma nyu si Christ, has ma peta henà nyu su phusung nyu tu nga

gbinyasan tu dlangit, ditu si Christ peginghud tu kinulesì en tu rapit dlintu nu Diwata. Dlelayun petahenà nyu su phihilan nyu tu nga gbinyasan ditu, henà tu nga gbinyasan di dibabaw nu dlupà hi ni. Shapap minatay amu na, dahus su hetubù nyu miledlud duma ni Christ ditu Diwata. —Colossae 3:1-3

Dahus su nga getaw mipedleng-ed ni Christ Jesus mipatay nilan na su dinyatan kilawan piruma run su helon thegi bu dlyagan nlan. Su Medlengaw mibegay en ryanta su hetubù; subay rema pendegen nen su hetubù ta.

—Galatia 5:24, 25

Gmelayù dlupà! Minatay ita na mahatag di dusa—megendun sap i henamal ta megunung ditu? Misshama ritu i dalan nen, yamu subay pemihilen nyu mà run minatay amu na mahatag di dusa ugaid pegitubù amu tu Diwata tu hehunay nyu rin ni Christ Jesus.

—Rome 6:2 dahus 11

Dahus hini su pithuhesian: Bigay nu Diwata rin ryanta su methunay hetubù, dahus hini hetubù phun nen tu dyanin Gbatà; én i getaw mihalap tu Gbatà din ryanin su hetubù hini; én i getaw gendà en halap su Gbatà nu Diwata gendà ryanin su hetubù.

—1 John 5:11, 12

METHUNAY HETUBU

Mbà hyanin megimula tu dlusud gbinal nu kinilawan nga dlyagan nen, genat ritu megani nen su shenghù nu hepatay; mbà hyanin megimula tu gbinal nu Medlen-

gaw, genat ritu megani nen su shenghù nu thunay hetubù.

—Galatia 6:8

Dahus maantu tinunggul ni Moses su nipay galang tu dlupà gen-

dà i pegbenwa run, maantu ra rema subay metunggul su Gbatà Getaw, dari su dlemon sumalig ryanin merunan hetubù methunay.

—John 3:14, 15

“Dahus hini su methunay hetubù: dari meteleru nu nga getaw yaa su benal Diwata, dahus mesunan nlan inan si Jesus Christ, su sinugù mu.”

—John 17:3

Su sumalig tu Gbatà dun hetubù en methunay; su genì mengunut tu Gbatà gendì mehénam tu hetubù, ugaid metenà ryanin su dlengenget nu Diwata sampay ndà i githeb en.

—John 3:36

Shapap byaran nu dusa su shu-

hay en-su hepatay; ugaid thulon bigay nu Diwata su thunay hetubù miseled tu hehunay ta tu dyan ta Kunutan si Christ Jesus.

—Rome 6:23

“Talù u ryanyu su gmetud: su mekineg tu nga thalù u, dahus mebenalan tu suminugù ryanan, dun hetubù en methunay. Gendì na hyanin uhumen, ugaid mihabayan na hyanin genat tu hepatay ditu na hetubù.”

—John 5:24

Dahus hini su pithuhesian: Bigay nu Diwata rin ryanta su methunay hetubù, dahus hini hetubù phun nen tu dyanin Gbatà.

—1 John 5:11

HEBENALAN TU HESULEGA

Su Medlengaw nu Diwata humampù tu nga medlengaw ta pesabut en mà run ita nga gbatà nu Diwata.

—Rome 8:16

Én i getaw mihalap tu Gbatà din ryanin su hetubù hini; én i getaw gendà en halap su Gbatà nu Diwata gendà ryanin su hetubù. Sinulatan hu yamu mahatag rini dari mesunan nyu dun thunay hetubù nyu—su yamu suminalig tu ngalan nu Gbatà nu Diwata.

—1 John 5:12, 13

“Su tumalimà tu nga phinteran hu dahus tumanan nlan itu, hyanin su pedlalam ryanan. Lelamen ni Amà su gmelalam ryanan; lela-

men hu ra rema hyanin bu pélala hu su dlawas u din ryanin.”

—John 14:21

Pulù métà mà run yamu dyanin nga gbatà, piwit nu Diwata su Medlengaw nu dyanin Gbatà tu nga phusung ta, su Medlengaw meshabi, “Amà, Amà u.”

—Galatia 4:6

Mipagenget tu ita Diwata dahus din ryanta su Diwata hagina bigay en ryanta su Medlengaw en.

—1 John 4:13

Mbà tumanan ta su nga phinteran nu Diwata, mipagenget di gina ta sunan ta hyanin.

—1 John 2:3

DUN DLEYAG TU GBENWANAN NI CHRIST

“Dahus nandaw pegulì u na tu ryania, dahus teluen hu i nga gbinyasan hini dini dunya dari malap nilan su dleyag u tu helon heganap en.” —John 17:13

“... Meremengamu nandaw, ugaid métà u ra yamu pulì, dahus lelyagenamu thandeng dahus hini dleyag gendà i getaw mahawà run ryanyu.” —John 16:22

Shapap su Pidlegerian nu Diwata henà hin i hepentagan nen i hehan atawa hinum, ugaid hepentagan nen su hetiddu, helinaw dahus dleyag pegbegay run su Misenggay Medlengaw.

—Rome 14:17

Dlelamen nyu hyanin, pya sì gendà nyu métà hyanin, dahus suminalig amu ryanin, pya sì nandaw gendì nyu métà hyanin. Haguña maantu middlelyag amu miumura su gembagel bu gembantug dleyag hitu gendì megaga bwan-gay di thalù. —1 Peter 1:8

Dari henà na inan i pegitubù, ugaid si Christ na i pegitubù rini ryanan. Hini hetubù u nandaw, pegitubù u pibyan tu heshalig u tu Gbatà nu Diwata, hyanin su mihalalam ryanan dahus bigay en su hetubù en shapap ryanan.

—Galatia 2:20

“Tinalù u ini ryanyu, dari merin

ryanyu su dleyag u, dahus dari
megusay gumanap su dleyag
nyu.”

—John 15:11

Dahus si Christ megbal gbenwa

nen tu phusung nyu pibyan tu he-
shalig. Phenenginengin hu hitu
mahapengganget amu bu mahata-
nem amu tu dlelaman.

—Ephesus 3:17

SUBAY DON HENGUNOT TU DIWATA

Shapap henà pibyan tu hekineg
tu Phalinta i nga getaw mebetang
gmetiddu tu gunan nu Diwata,
ugaid pibyan tu hetuman nu nga
getaw tu piminted tu Phalinta.

—Rome 2:13

Sunan nyu ma mbà lillà nyu su
dlawas nyu meshyolipen amu tu
selataw getaw, su gmetud, guli-
pen amu nu pingunutan nyu gapù
nyu—mbà tà tu dusa, helegan nen

su hepatay, atawa tu hengunut,
helegan nen su hebetang ryanyu
gmetiddu tu Diwata. —Rome 6:16

Dahus polelin nen su yamu mi-
lasay maantu ra rema yami. Peg-
betaren nen ini sà mepulì na su
Kunutan si Jesus genat tu dlangit
uyugan nu gmahaseheg nga ge-
taw-langit shesuguen nen, megwit
ilan nga pedluginlab gapuy, pù
berasan su dlemon nga gendi tu-

malimà tu Diwata dahus su nga gendi meginugut tu Gempya Guhiten mahatag tu dyanta Kunutan si Jesus. Helesayan nlan su gbaras tu thunay hebinasa, awà ilan genat tu gerapan nu Kunutan dahus genat tu pegbantug shehegen.

—2 Thessalonica 1:7-9

Pengumpyanan su dlemon minggedak mitilak su nga phenepeten nilan, dari mbegay ryanlan su hepatut human tu gbunga nu gayu mahagbegay hetubù dahus mayan tu thembangan sumeled hyanin tu dlusud gbenwa hya.

—Pilingasà 22:14

SUBAY MEMUHA A TU NI CHRIST

Dahus helon getaw mephepayag run mà run si Jesus Christ hin su Kunutan, hitu phebantug tu Diwata Gamà. —Philippi 2:11

“Én i getaw pepyagen nen mà run hyanin dyanan getaw, maantu ra rema hebal u ryanin tu guan ni Amà u tu dlangit. Ugaid én

i getaw pemelawan nen inan, pemelawan hu ra rema hyanin tu guan ni Amà u tu dlangit.”

—Matthew 10:32, 33

Mbà buhaen nu gbibig mu, “Si Jesus i Kunutan,” dahus meturan ha di gina mu mà run biwat nu Diwata hyanin genat tu hepatay mi-

tubù pulì, megon ha. Shapap mi-phetud ita genat tu phusung ta dahus mibetang ita gmetiddu tu Diwata; pimuhà ta ini dahus migon ita.

—Rome 10:9, 10

“Mbà su getaw mesipeg ryanan dahus tu thintuluan hu, su rema Gbatà Getaw mesipeg ryanin, sàmà hyanin pulì na rini meseluk en

na su helon gbantug nu Gamà en dahus nu nga misenggay getaw-langit shesuguen nu Diwata.”

—Luke 9:26

Hagina én i getaw puhasan nen su Gbatà puhasan nen da rema su Gamà; én i getaw tumabuk tu Gbatà tinabuk en da rema su Gamà.

—1 John 2:23

SI SATAN, DYANTA NGUSÙ

Dlelayun penigam amu, dlelayun pengingat amu! Ngusù nyu, su Dlatnawà, peshugudsugud maantu dlimong pengmanghe-long, pephenengaw getaw dulen nen.

—1 Peter 5:8

Su Selataw Gmelat merateng

kin ryanin su gbalahat nu Satan dahus peguléhen nen su helon gbalus nga gmahaseselebù bu nga thuus.

—2 Thessalonica 2:9

“Subay puhaen mu su nga mata nlan, dahus pepulì mu ilan genat tu gmerelem pangay mu ilan tu

gmerelag, dahus genat tu thegel ni Satan, pangay mu ilan tu Diwata, dari pibyan tu shalig nlan ryanan mampun su nga dusa nlan bu malap nlan su thendaan nlan meruma tu nga getaw pimili nu Diwata.”

—Nga Pigbetad 26:18

Na, ginaleg nu Medlengaw si Jesus tu dlupà gendà i pegbenwa run penushun nu Dlatnawà. Simbag ni Jesus, “Awà a rin, Satan! Tinalù tu sinulat thalù Diwata, ‘Sudyutay mu su Kunutan dyania Diwata dahus hyanin lakan tamuy

mu!’ ” Mandyari giwaan hyanin nu Dlatnawà; dahus minateng su nga getaw-langit shesuguen nu Diwata, gibangan nlan hyanin.

—Matthew 4:1 dahus 10, 11

Tu deshuan nen, pheseheg amu tu hehunay nyu tu Kunutan dahus pibyan tu gmeseheg gbalahat en. Tiggan nyu seluhay su dlamina bigay nu Diwata rin ryanu, dari mahagindeg amu sumaggà tu nga gmelat gahal nu Dlatnawà.

—Ephesus 6:10, 11

HAMENDAG GENAT NI SATAN

Haguna su nga gembatà, maantu i hetawag en ryanlan, nga

getaw ilan di guned bu di dugù, si Jesus mibaluy manin ryanlan

dahus minilasan tu dinyatan nlan kinilawan. Pigbetad en itu dari pibyan tu hepatay en mpedlatan nen su Dlatnawà, su dun thegel en tu hepatay.

—Hebrew 2:14

Su getaw lolosen nen su herusa
nen pidlegetawan nu Dlatnawà,
hagina su Dlatnawà gbalarusa ge-
nat pa tu piphunpunan. Hini i sha-
pap en tuminwà su Gbatà nu Di-
wata, dari pedlatan nen su nga ga-
lebek nu Dlatnawà.

—1 John 3:8

Getaway ma, mbà maantu, i ma-
hapeshway ryanta genat tu dlela-
man ni Christ? Tà itu shusa i ma-
hapeshway ryanta, atawa su kele-
genay, atawa su hephelat, atawa
su gutom, atawa su hengmisihin,

atawa su ketipwan, atawa su he-
patay? Henà, ugaid di helon gbin-
yasan hini mimendag ita megusay
pibyan rin ni Jesus su mahalalam
ryanta!

—Rome 8:35 dahus 37

Haguna maantu, petapenay
nyu su hetubù nyu tu Diwata.
Atu amu tu Dlatnawà, dahus pele-
guyan nen yamu. Pephesempel
amu tu Diwata, dahus hin mephe-
sempel rin ryanyu. . . .

—James 4:7, 8

Mandyari su Selataw Gmelat
petwaen na, ugaid mbà merateng
su Kunutan si Jesus, bunuen nen i
Selataw Gmelat hya pibyan tu gi-
na genat tu gbabà en dahus pedla-
tan nen hyanin pibyan tu gmaha-

sulawsulaw hephétà en. Su Selataw Gmelat merateng kin ryanin su gbalahat nu Satan dahus pegu-

léhen nen su helon gbalus nga gmahaseselebù bu nga thuus.

—2 Thessalonica 2:8, 9

DLELAMAN, SU GINDAN TU HEGINUGOT

Mabù megaga u hethalù u nga dlénlén thalù nu nga getaw dahus pya nga thalù nu nga getaw langit shesuguen, ugaid mbà ndà i run i dlelaman hu, su nga thalù u maantu laki gmalimut gbasal gagung atawa maantu thinting gbesalen.

—1 Corinth 13:1

Herwà meshak ni Jesus ryanin, “Simon, gbatà ni John, tà itu dlelamen mu inan?” Simbag en, “Waa, Kunutan, sunan mu dlelamen hu yaa.” Tinalù ni Jesus

ryanin, “Ipat mu su nga gibilili u.”
—John 21:16

Ugaid su Medlengaw mephe-senghù dlelaman, dleyag, helinaw, hesabal, hesangù, hongangen, hetugaling, hebabà gmalatabat, dahus hependeg tu gina. . . .

—Galatia 5:22, 23

“Mbà dlelamen nyu inan, tumanan nyu su nga phinteran hu.”
—John 14:15

Mbà dun i getaw methalù, “Dlelamen hu su Diwata,” ugaid

mbà gmangit sap tu shamataw en, getaw hya gbelusen; hagina megendun helalam en tu Diwata hitu gendà en métà, mbà gendà i dlelaman nen tu shamataw en su pegitaan nen.

—1 John 4:20

“Mbà dun dlelaman nyu tu nga duma nyu, su helon getaw mélala

nlan yamu nga tinintuluan hu.”

—John 13:35

Sunan ta miwaan ta na su hepatay, dahus mirepet ita na tu hetubù: sunan ta hagina dlelamen ta su nga shamataw ta. Su getaw gendi melalam kin pa hyanin hepatay.

—1 John 3:14

SU HEGBUAT HETUBÙ PULÌ NI JESUS GENAT RITO DLEBENG

“Yami i nga thuhasi tu helon pigbetad en tu dlusud dlupà nu nga Jew bu tu dlusud Jerusalem. Binunù nilan hyanin tinutuhan ni-lan tu gbansulang. Ugaid telu ndaw dlwat lebengen biwat hya-

nin nu Diwata, mitubù pulì genat tu hepatay, dahus pitwà hyanin nu Diwata, henà tu helon nga getaw, ugaid din lak ryanami su gandang pimili nu Diwata nga thuhasi. Suminalu ami ryanin hu-

**man bu minum dlwat tu hegbwat
en mitubù pili genat tu hepatay.”**

—Nga Pigbetad 10:39-41

**Dlwat na ni Jesus migbwat, mi-
tubù pulì, shunguk shiselem, tu
myuna gendaw tu pharian, gbek-
na miphétà hyanin tu ni Mary
Magdalene su pilyawa ni Jesus
rin ryanin pitu buk nga dlatnawà.**

—Mark 16:9

**Mihabayan i sahaparian mipuli
methimù dya dyalem gbalay su
nga tinintuluau dahus ditu ryan-
lan si Thomas. Pingunsian su nga
phintù, ugaid miseput si Jesus
migindeg tu thitengà nilan dahus
tinalù en, “Din ryanyu su heli-**

**naw.” Muhà tinalù en rin ni Tho-
mas, “Delù mu ini, dahus thenggi
mu i nga kemet u; get mu i kemet
mu dahus shuk mu dini gilid u.
Sugat mu na medwarwà dahus
pephetud a!” Simbag ni Thomas
ryanin, “Dyanan Kunutan bu
dyanan Diwata!” —John 20:26-28**

**Bigay hyanin matay shapap tu
nga dusa ta, dahus binwat pitubù
puli hyanin dari mebetang ita
gmetiddu tu Diwata. —Rome 4:25**

**Unuten tu gmiriwata heseng-
gay en, mipélala hyanin Gbatà nu
Diwata duma su gembagel gbal-
hat pibyan tu hebwat ryanin pitu-
bù pulì genat tu hepatay.**

—Rome 1:4

SU HEGBUAT HETUBÙ PULÌ, SU GBANTOG PERETENGEN TA

“Talù u ryanyu su gmetud: su dyanghà pedateng—su dyanghà gandang na minateng—su nga mimatay merengeg nlan su dlagaw nu Gbatà Diwata, dahus su dlemon maharengeg run metubù. Gendì amu hesebuay run ini; su dyanghà pedateng, merengeg nu helon nga mimatay su dlagaw en, dahus memedlyawa ilan genat tu dlebeng nlan: su dlemon gempya i pigbetad en megbwat bu metubù, dahus su dlemon gmelat i pigbetad en megbwat dahus uhumen binasa.” —John 5:25 dahus 28, 29

Su shabenal sunan nyu ini: su

hebaptays ryanta mihunay ita tu ni Christ Jesus, pibaptaysan ita dari mehunay ita tu dyanin hepatay. Haguna maantu, pibyan tu hebaptays ryanta, milebeng ita duma ta hyanin dahus miharuma ita tu hepatay en, dari, maantu si Christ biwat pitubù pulì genat tu hepatay pibyan tu pegbantug gbalahat nu Gamà, ita rema malus metubù ita tu gbegu hetubù. Hagina mbà miselabuk ita ryanin tu hepatay maantu hepatay en, mishama ritu i dalan nen heselabuk ta ryanin pibyan tu hebwat

ryanta metubù pulì maantu ryanin.
—Rome 6:3-5

Ugaid mbà rin ryanyu si Christ, . . . degid su Medlengaw i dyanyu hetubù hagina mibetang amu na gmetiddu tu Diwata. Dahus mbà su Meglengaw nu Diwata, su minwat miphetubù pulì rin

ni Jesus genat tu hepatay, hyanin i pegbenwa di sheled nu hetubù nyu, mandyari su minwat miphetubù pulì rin ni Christ genat tu hepatay begayan nen da rema nya-wa su dlawas nyu medlegumul pibyan tu dyanin Medlengaw hitu pegbenwa rin ryanyu.

—Rome 8:10, 11

HESENGGAY TU KUNUTAN

“Dahus mishapa mà run gonennen ita genat tu nga ngusù ta, dahus bwangen nen ita temuyen ta hyanin gendà i hendek ta; bu mesenggay ita dahus metiddu ita tu gunan nen, shegay ta pegitubù.”

—Luke 1:74, 75

Dyanan gmahapulù phahat, helon nga phasad hini binal rin ryan-ta! Haguna maantu, tilahen ta su hetubù ta genat tu tingintingin mahatamak tu dlawas ta atawa kalag ta dahus balen ta su hegusay ta mesenggay pibyan tu dlela-

yun hegerab ta tu Diwata.

—2 Corinth 7:1

“Pebaptaysan hu yamu thubig gilayan tu hephalin nyu; ugaid su pedateng metundug ryanan baptaysen nen ryanyu su Misenggay Medlengaw bu gapuy. Dlabi pa gempulù genat ryanan; gendi u melepeng hyanin, henà u tanan di kenuhu nen.” —Matthew 3:11

Mipemili amu sumalà tu gaway nu Diwata Gamà dahus binal amu nga getaw singgay pibyan tu dyanin Medlengaw, dari mengunut amu rin ni Jesus Christ dahus metilak amu pibyan tu dyanin du-gù. . . . —1 Peter 1:2

Mbà su getaw tilahen nen i dla-was en genat di nga golaola hini gmelat, hyanin megamit tu maha-birà gbalan run, hagina hyanin misenggay dahus gmelon gbalan ryanin nu Gapù en, dahus hagina mihangandam tu helon gulék gempya. —2 Timothy 2:21

Ugaid, hagina su Diwata tumi-nawag ryanyu misenggay, subay rema yamu, hesenggay amu tu he-lon pegbetaren nyu. —1 Peter 1:15

Su Diwata gendà en ita twagay pù tumubù ita tu gmahalemulemù golaola, ugaid tiwagan nen ita dari tumubù ita tu hesenggay bu hetilak golaola. —1 Thessalonica 4:7

HESENGGAY TU KUNUTAN

Has si Jesus dema minatay tu dlyu nu dlusud gbenwa, dari metilak en su nga getaw genat tu dusa nlan pibyan tu dugù en.

—Hebrew 13:12

Ndà pa limbagay su dunya, pimili ita na nu Diwata mbal nga gbatà en pibyan rìn ni Christ, dari mesenggay ita dahus gendà i shalà ta tu gunan nen.... Dahus subay hin seluk nyu su gbegu thubuan, tiwang itu hin ginalap dleyawan su phalas nu Diwata dahus mepelingasà itu ri gmetud hetubù su gmetiddu bu misenggay.

—Ephesus 1:4; 4:24

Ugaid mbà pemuhaen ta tu Di-

wata su nga dusa ta, hyanin tumanan nen su phasad en dahus peguléhen nen su gmetiddu: empunen nen su nga dusa ta dahus tilahen nen ita genat tu helon nga dlad ta.

—1 John 1:9

Hagina su helon nga gbinyasan medlat gmà nini i dalan nen, yamu, alan ma i malus phalas nu hedlegetaw nyu? ... —2 Peter 3:11

Pethetesay nyu su hepya dlalahaw nyu tu helon getaw, dahus penelamay nyu su hetubù misenggay, hagina lyu rini ndà i run i getaw mahétà tu Kunutan.

—Hebrew 12:14

NGA GETAW MIPENU NU MESENGGAY

“Mbà su getaw gbalarusa manin ryanyu, sunan nyu i hegbegay nyu nga gempya gbinyasan tu nga gbatà nyu, shalabi run su Gamà nyu tu dlangit peguléhen nen i maantu, shapap begay en su Misenggay Medlengaw tu dlemon menengi run ryanin.” —Luke 11:13

Dlwat nilan menenginengi, mgedyug su gbalay pidlimuran nilan. Su helon nlan mipenù nu Misenggay Medlengaw dahus mibelu ilan memitwa tu thintuluan nu Diwata. —Nga Pigbetad 4:31

Ugaid si Stephen, mipenù nu Misenggay Medlengaw, mingeleng tu dlangit dahus minità en

su dlengasan nu Diwata, dahus si Jesus pegindeg tu rapit dlintu nu Diwata. —Nga Pigbetad 7:55

Ugaid mbà su Medlengaw nu Diwata pegbenwa tuu rin ryanyu; su hetubù nyu pedleguhuman nen dahus mengunut amu tu teluen nen ryanyu. Su getaw gendà rin ryanin su Medlengaw ni Christ, hyanin henà getaw ni Christ.

—Rome 8:9

“Ugaid mepenù amu gbalahat samà tumenà na ryanyu su Misenggay Medlengaw, dahus mebal amu nga thuhasi . . .”

—Nga Pigbetad 1:8

Si Barnabas gempya getaw, mipeñù nu Misenggay Medlengaw dahus gembagel i shalig en. . . .

—Nga Pigbetad 11:24

MAHASESELEBÙ PHASÀD TU NGA PHEGINUGOT

“Tumù, puna nyu tu helonen phemhilen nyu su Hependlegari nu Diwata dahus su helon phaut en, dahus ulagad en ryanyu helon nga dlén gbinyasan hini.”

—Matthew 6:33

“Waa,” tinalù ni Jesus, “mbà megaga mu! Helon nga gbinyasan megaga nu getaw dun i shalig en.”

—Mark 9:23

Nga gempulù phahat u, geni amu hesebuay tu gmesét nga gin-

Su nga tinintuluuan tu Antioch lilyag ilan thandeng dahus mipeñù ryanlan su Misenggay Medlengaw.

—Nga Pigbetad 13:52

dan pedlasay ryanyu, manin hya pishalebù su pekepenggolaola nyu. Tumù ra pedlelyag amu pù miharuma amu tu dlasay ni Christ, dari mepenù amu dlelyag samà nawan mepelingasà na su dyanin gbantug. —1 Peter 4:12, 13

“Punasan nen su helon dlwà tu nga gmata nilan. Ndà i run na i hepatay, ndà i run na i dlirùgina atawa hegayad atawa gmesét. Su

dan nga gbinyasan myalep na.”
—Pilingasà 21:4

“... Dahus delendem nyu! Inan dlelayun duma nyu, sampay mengitheb su dunya.” —Matthew 28:20

Pethigelay nyu su dlasay nyu

maantu gbaras genat rin ni amà nyu; tu helasay nyu mepétà mà run su Diwata hebalan nen ryan-yu maantu na thunganay nga gbatà en. Tà itu dun i gembatà ndà na ménsan berasay ni amà en?

—Hebrew 12:7

PHASAD RITO NGA PENUSHÙ

Dahus nandaw hyanin mahagabang tu dlemon mayan di phenushu, hagina hyanin minayan di phenushu dahus milasay.

—Hebrew 2:18

Dahus su Diwata, hyanin su phun nu helinaw ta, gendi moget dahurahan nen si Satan mepesà

tu shilung geshud nyu.

—Rome 16:20

Sunan ta mà run tu helon nga gbinyasan su Diwata megulék shapap tu hepya nu dlemon nga mahalalam ryanin, su dlemon tinawag en sumalà tu dyanin gaway.

—Rome 8:28

Sapalati su dlibun pheginugut

ugaid su gulegaren nen henà phe-ginugut dahus gmesibà ra su dwayan nlan, gendì malus belengan nu dlibun su gulegaren nen.

—1 Corinth 10:13

Dahus hini nga gbatàbatà sha-shat phahalasay ami run mwitan nen da yami gembagel thandeng dahus methunay gbantug, labi pa

gempulù di nga shashat hini.

—2 Corinth 4:17

Lelyagen su getaw phenugaling tu heginugut, pya sì gmelon i sha-shat mahabayán ryanin, pù mbà megaga nen su gindan ryanin, malap en thumbas ryanin su hetubù pinasad nu Diwata tu dlemon gmahalalam ryanin. —James 1:12

PHASAD RITO NGA MIHAMENDÀG

“Su hin mahamendag, balen hu hyanin gered tu gembagel shimbahan nu dyanan Diwata, dahus gendì en na waan ya. Sulat u ryanin su ngalan nu Diwata u bu su ngalan nu gbenwa nu Diwata u, su gbegu Jerusalem, hitu tu-

menà genat tu dlangit genat tu dyanan Diwata. Sulat u ra remarin ryanin su gbegu ngalan hu.”

—Pilingasà 3:12

“Su dlemon nga memendag penepatan ilan gmà nini di gemputi, dahus gendì u leshuen su ngalan

nlan tu dlibru nu pegitubù. Tu gunan ni Amà u bu tu gunan nu nga getaw-langit shesuguen nen pep-yagen hu mà run ilan dyanan nga getaw.”

—Pilingasà 3:5

“Su dlemon mahamendag begay u ryanin su hepatut en suméng din ryanan meginghud tu kinulesì u, maantu ra inan mihamendag u dahus nandaw mihaséng u tu Gamà meginghud tu kinulesì en.”

—Pilingasà 3:21

“Su mahamendag malap en genat ryanan hini: inan i mbal Diwata nen, dahus hin mebal gbatà u.”

—Pilingasà 21:7

“Na mbà dun thelinga nyu, pikingay nyu su tinalù nu Medlen-gaw tu nga shimbahan! Su dlemon mahamendag bwangen hu human tu gbunga nu gayu mahabegay hetubù pepengintubù tu sheled Phegimulanan nu Diwata.”

—Pilingasà 2:7

SU DIWATA MIPINDA RAYNTA MAHATAG TU HEGBELENG

Dun phinteran hu tu nga getaw pedway, degid hini phinteran henà dyanan, dyan nu Kunutan:

gendì malus belengan nu dlibun su gulegaren nen; mbà meleng hyanin, subay gendì na pulì dum-

way lumwal hin da pulien nen su
gulegaren nen; dahus gendì malus
da rema belengan nu dlai su sha-
matau nen. —1 Corinth 7:10, 11

Sapalati, su dlibun pedway,
hyanin minihetan tu phalinta nu
gulegaren nen shegay pegitubù
hya gulegaren nen; ugaid mbà ma-
tay na su gulegaren nen, hyanin
mihalwas na tu phalinta mihéhet
ryanin tu gulegaren nen. Haguna
maantu, sà hyanin megegambyan
di dlén dlai shegay pegitubù su
gulegaren nen, metalù hyanin
middlehelyag; ugaid mbà matay na
su gulegaren nen, tu dyalem nu
phalinta mihalwas na hyanin, da-

hus mbà pulì hyanin dumway
gendì na metalù midlehelyag.

—Rome 7:2, 3

“Én i getaw meleng tu shawa
nen dahus medlén mengensawa
hyanin midlehelyag; dahus su dlai
malap tu dlibun gbitwanen midle-
helyag hyanin.” —Luke 16:18

“Ugaid nandaw talù u ryanyu:
mbà su dlai belengan nen su sha-
matau nen, dahus hini shamatau
nen ndà ra pedlénlén run, dun
gmelat nu dlai hya pù misabà en
medlehelyag su shamatau nen
samà lapen dlén dlai; dahus su
dlai mahalap ryanin pigbetad en
su hedlehelyag.” —Matthew 5:32

SU GENDAW DATÉNG NI CHRIST

“Dahus mbà mahapanaw u na ritu bu mesagipaan hu na yamu dalepaan nyu, mpulì u rini witen hu yamu tu ryanan, dari arin i hebetangan hu ditu amu ra rema hebetang.”
—John 14:3

“Mesayu u na rateng. Peshibaay mu pegwiray su rin na ryania, dari gendà i mahagaw tu thumbas tu hegaga mu.”
—Pilingasà 3:11

“Haguna maantu su getaw mesipeg ryanan dahus tu nga thintuluan hu di gendawan hini gmaharupang su nga getaw dahus gendi mengunut tu Diwata, su Gbatà Getaw mesipeg da rema ryanin,

samà mateng hyanin tu gbantug nu Gamà en duma nen su nga misenggay getaw-langit shesuguen nu Diwata.”
—Mark 8:38

“Mandyari su thuus nu Gbatà Getaw tumwà tu dlangit; muhà su helon nga thupwan getaw rini dunya memegayad, dahus métà nlan su Gbatà Getaw pedateng tu dibabaw nu gbeletuhay tu dlangit munutan gbalahat bu gembagel gbantug.”
—Matthew 24:30

Yamu, subay gmesabal amu ra rema. Petas nyu su hederama nyu pù gmesempel na su hepulì nu Kumanutan.
—James 5:8

“Shapap su Gbatà Getaw ma-teng maantu gilat lethesen nen i

dlangit genat tu shilangan man-gay tu shindepan.” —Matthew 24:27

SU GENDAW DATÉNG NI CHRIST

Tinalù nilan tu ryanlan, “Nga getaw Galilee, muma memegin-deg amu rin medlinghagà amu tu dlangit? Si Jesus hini, su ginalap genat ryanyu pilagay tu dlangit, pulì ra nawan meshama ra i hétà nyu ryanin manin nandaw hini helagay en tu dlangit.”

—Nga Pigbetad 1:11

“Mandyari su Gbatà Getaw tumwà pedateng di thitengà nu gbeletuhay munutan gembagel gbalahat bu gbantug.”

—Luke 21:27

Dyanan gempulù nga phahat, nandaw nga gbatà ita na nu Diwata, ugaid gendi pa melintang alan i hebeyuan ta. Ugaid sunan ta samà tumwà na si Christ, ita, me-baluy ita manin ryanin, hagina megusay ta na mepalas getaway hyanin. Su helon getaw pederama gmá nini rin ni Christ petilahen nen su hetubù en, maantu ra ni Christ gmetilak. —1 John 3:2, 3

“Pekineg a! Pedateng u pulì u rini maantu gmeraw! Lelyagen su dlelayun pegitanud dahus su pe-

theleru tu nga phenepeten nen,
dari gendi hyanin mephanawpa-
naw pedlebas dahus mesipegán
hyanin tu dlelimalà gmata nu nga
getaw!”

—Pilingasà 16:15

“Maantu ra rema i dalandalan
nen, yamu, peshagipà amu, hagi-
na su Gbatà Getaw merateng tu

dyanghà henà nyu hyanin pephe-
retengen.”

—Luke 12:40

“Shapap su Gbatà Getaw shu-
ngu na mateng di gbantug nu Ga-
mà en duma nen su nga getaw-
langit shesuguen nen, dlwat itu
begay en su thumbas tu dyarya
selataw sumalà tu mipegulék en.”

—Matthew 16:27

SU THALÙ NU DIWATA

“Su dlangit bu su dlupà malep
da, ugaid su nga thalù u gendi kal-
yali mbeleng.”

—Luke 21:33

“Shapap su pimitwà nu nga ke-
tauwan mahatag tu mepenggo-
laola nawan henà phigenat tu kel-
yang nu getaw, ugaid hini nga

getaw ginuleligan ilan nu Miseng-
gay Medlengaw shenanan nlan
methalù tu thintuluan genat tu
Diwata.”

—2 Peter 1:21

Su helon Sinulat Thalù Diwata
misulat pipihil nu Diwata tu
misenggay nga getaw en dahus

gemiten tù thintuluan mahatag tu gmetud, tu hapedlong tu dla-pang, tu holi tu nga dlad, dahus

hegagi tu hetubì gmetiddu.

—2 Timothy 3:16

HENENGI—NENGI DAHUS HEPHAMPO

“Haguna maantu, hini i malus henenginengi nyu: ‘Dyanami Gamà tu dlangit: ndyumen hu su ngalan mu pegeraban thandeng; ndyumen hu mateng na su Haped-legari mu; ndyumen hu metumanan na su kelyag mu rini dunya maantu ra tu dlangit. Begay ryanami nandaw su gan mahoyag ryanami gendaw-gendaw. Ampun mu ryanami su nga dlad nami, maantu ra hampun nami tu nga dlad pigbetad ryanami nu nga du-

ma nami. Gendi mu witay yami tu gempasang nga gindan, ugaid ipaten ami genat tu Selataw Gmelat.’ Mbà empunen nyu su nga dlad pigbetad ryanyu nu nga duma nyu, empunen amu ra rema nu Gamà nyu tu dlangit. Ugaid mbà gendi nyu empunen su nga dlad ryanyu nu nga duma nyu, gendi ra rema empunen nu Gamà nyu tu dlangit su nga dlad pigbetad nyu.”

—Matthew 6:9-15

Published in numerous languages as God supplies funds in answer to prayer. If you would like more copies for prayerful distribution, write in English. Specify which language(s) you need and how many booklets.

World Missionary Press, PO Box 120, New Paris, IN 46553-0120 USA



Read booklets online or by App
www.wmp-readonline.org